



PERCUBAAN FAHAMAN KOMUNIS MENGUASAI PARTI KEBANGSAAN MELAYU MALAYA (PKMM)

MOHD ABDUL AZIZ AHMAD *

MOKHTARRUDIN AHMAD **

mr.abdul87@gmail.com

Abstrak

Penyebaran fahaman komunis di Tanah Melayu dilakukan oleh Parti Komunis Malaya (PKM), fahaman komunis pada peringkat awalnya disebarkan di kalangan masyarakat Cina sahaja, kemudiannya mereka menyebarkan fahaman mereka kepada masyarakat Melayu. Fahaman komunis disebarkan kepada masyarakat Melayu melalui dua kaedah. Pertama, penyebaran secara langsung kepada orang Melayu (propaganda atau penyebaran ideologi komunis dilakukan secara terus melalui Parti Komunis Malaya); dan kedua, melalui penguasaan parti politik Melayu (menguasai parti politik Melayu dan menyebarkan ideologi komunis dalam parti politik Melayu tersebut). Kajian mengenai kaedah pertama sudah banyak dihasilkan oleh penyelidik sebelum ini. Oleh itu, artikel ini bermatlamat meneliti kaedah kedua komunis iaitu melalui penguasaan parti politik Melayu iaitu Parti Kebangsaan Melayu Malaya (PKMM). Perkara yang menjadi persoalan kajian ialah sejauh manakah fahaman komunis berjaya menguasai PKMM? Bagi menjawab persoalan kajian, kaedah kualitatif digunakan berdasarkan kepada analisis teks bertemakan sejarah politik. Hasil analisis ini pengkaji telah mendapati fahaman komunis tidak dapat menguasai kepimpinan dan dasar parti kerana dalam PKMM mempunyai tiga aliran iaitu aliran nasionalis, aliran agama dan aliran komunis. Aliran yang menguasai kepimpinan adalah aliran nasionalis dan agama. Kegagalan fahaman komunis menguasai PKMM juga disebabkan oleh kerjasama yang terjalin antara mereka adalah atas sebab kepentingan masing-masing.

Katakunci: Parti Kebangsaan Melayu Malaya (PKMM), Parti Komunis Malaya (PKM), fahaman komunis.

* Pelajar Sarjana Sastera (Sejarah dan Tamadun) di Pusat Pengajian Bahasa dan Pembangunan Insaniah, UMK
** Profesor Madya di Pusat Pengajian Bahasa dan Pembangunan Insaniah, Universiti Malaysia Kelantan.





Abstract

The spread of communism in Malaya was undertaken by the Communist Party of Malaya (CPM). The movements of communism were initially diffused only among the Chinese community, then later on to the other communities. Communism was disseminated to the communities through two methods. Firstly, the ideology was spread directly to the Malays (the propaganda of communist ideology was made directly through the Malayan Communist Party); and secondly, it was carried out through the control of Malay political parties (by dominating the Malay political parties and spread the communist ideology in the Malay political parties). The study of the first method has been widely produced by the researchers before. Therefore, this article aims to examine the second method utilized by the communists to control the Malay political party, Parti Kebangsaan Melayu Malaya (PKMM). A question arises as to what extent the communists successfully gained control of PKMM? To answer the research question, a qualitative method is used based on the analysis of political history-themed texts. The result of the analysis, researcher found that communists did not dominate the leadership and policy of the party for PKMM consists of three streams which are the nationalist, religious and communist streams. The streams that took control of the leadership are the streams of nationalism and religion. The failure of communists to dominate PKMM was due to the cooperation linked between them and also because each of the streams cared for their own interests.

Keywords: *Parti Kebangsaan Melayu Malaya (PKMM), the Communist Party of Malaya (CPM), Communism*

* Master Student at Centre of Language Studies and Human Development, Universiti Malaysia Kelantan.

** Associate Professor at Centre of Language Studies and Human Development, Universiti Malaysia Kelantan.





1.0 Pendahuluan

Sejarah perkembangan fahaman komunis di Tanah Melayu sudah banyak dihasilkan oleh pengkaji awal, tetapi perbincangan berkaitan usaha komunis menyebarkan fahaman kepada orang Melayu amat sedikit. Hanya terdapat dua orang penyelidik sahaja iaitu Mahmud Embon dan Ho Hui Ling, tetapi kajian mereka tidak khusus kepada usaha komunis menguasai Parti Kebangsaan Melayu Malaya (PKMM). Kajian Mahmud Embon dalam makalah pertamanya *“Penglibatan orang Melayu dalam pergerakan komunis peringkat awal di Tanah Melayu, 1924-1938”* mengupas kegiatan agen komunis daripada Parti Komunis Indonesia (PKI) mempengaruhi orang Melayu menyertai komunis sejak awal tahun 1920-an dan perjuangan orang Melayu dalam komunis pada tahun 1930-an sahaja. Makalah kedua pula *“Komunis dan Orang Melayu 1924-1949”* membincangkan penglibatan orang Melayu dalam komunis secara berperingkat-peringkat 1924-1949 sehingga tertubuhnya rejimen ke-10 Pahang (Mahmud Embong, 1992). Kemudian Mahmud Embong menyiapkan tesisnya bertajuk *“Perkembangan Rejimen Ke-10 Melayu, Parti Komunis Malaya dari tahun 1949 hingga 1989”* juga memperinci tentang penglibatan orang Melayu dalam komunis (Mahmud Embong 1989). Ho Hui Ling pula menulis mengenai penglibatan orang Melayu dalam fahaman komunis pada tahun 2015 dalam makalahnya *“Gerakan komunis dan PKM: Penelitian Terhadap Usaha Komunis Mempengaruhi Orang Melayu 1920-1989”* yang turut mengkaji usaha pihak komunis menyebarkan fahaman mereka di kalangan orang Melayu hampir sama seperti kajian yang telah dilakukan oleh Mahmud Embong.

Berdasarkan kepada kajian lepas ini dapat dilihat terdapat sedikit ruang kajian yang belum diperinci iaitu usaha komunis menyebarkan pengaruhnya kepada orang Melayu melalui penguasaan parti politik orang Melayu. Oleh itu, objektif artikel ini ialah untuk melihat sejauhmanakah usaha serta kejayaan pihak komunis menguasai parti politik Melayu khasnya PKMM. Penelitian ke atas usaha komunis menyebarkan pengaruh mereka melalui penyeludupan masuk dalam gerakan politik Melayu ini akan memberi sedikit sebanyak pengetahuan baru kepada para pengkaji untuk melihat secara keseluruhan usaha komunis melebarkan fahamannya dalam kalangan orang Melayu di samping kajian yang sedia ada.

2.0 Parti Komunis Malaya (PKM)

Fahaman komunis telah dibawa masuk ke Tanah Melayu sejak awal tahun 1920-an lagi melalui cawangan Parti Komintang (KMT) daripada negara China. KMT menjadi rating atau cawangan kepada penyebaran fahaman komunis di Tanah Melayu. Namun, setelah berlaku pergolakan politik antara KMT dengan Parti Komunis China (PKC) dan kematian Dr. Sun Yat Sen pada Mac 1925, komunis tidak lagi menggunakan rating KMT sebagai agen penyebar fahaman komunis di Tanah Melayu. Hal ini disebabkan gabungan KMT-PKC telah berpecah pada 1927. Kemudian komunis telah menubuh Parti Komunis Nanyang pada Mac 1928 di bawah naungan Biro Timur Jauh Comintern





di Shanghai untuk menyelaraskan pergerakan dan penyebaran fahaman komunis di Tanah Melayu, Thailand, Burma, Annam, Indochina, Indonesia dan Singapura sebagai pengkalan. Namun, usaha menyelaraskan tidak berjaya. Akhirnya pihak komunis Tanah Melayu menubuhkan sendiri Parti Komunis Malaya (PKM) pada 30 April 1930 (Ho Hui Ling, 2015).

Matlamat utama penubuhan PKM adalah untuk menentang penjajah dan membentuk sebuah republik komunis di Tanah Melayu. Pada peringkat awal, PKM menyebarkan fahaman komunis hanya dalam kalangan masyarakat Cina sahaja iaitu melalui kesatuan pekerja, pertubuhan-pertubuhan sosial, sekolah dan akhbar. Kemudian PKM cuba menyebarkan fahaman komunis dalam kalangan orang Melayu, tetapi orang Melayu tidak menyukai komunis kerana mereka pernah berkonflik dengan orang Melayu dalam peristiwa kekejaman *Malayan People's Anti-Japanese Army* (MPAJA).¹ Peristiwa kekejaman ini berlaku semasa kekalahan tentera Jepun dan penguasaan MPAJA di Tanah Melayu selama empat belas hari. Pada masa ini orang Cina yang majoriti tentera MPAJA melepaskan dendam terhadap orang Melayu kerana terhadap segelintir orang Melayu menjadi tali barut Jepun semasa pendudukan Jepun yang kejam kepada orang Cina (Ahmat Adam, 2001).

Bagi memulihkan hubungan serta pandangan negatif orang Melayu terhadap PKM, mereka menggunakan dua pendekatan. Pertama, peranan ahli komunis daripada PKI seperti Sneevliet, Baars, Semaun, Darsono, Tan Melaka, Alimin dan Hassanoesi bagi mempengaruhi orang Melayu secara langsung (Ho Hui Ling, 2015). Kedua, melalui penyerapan fahaman komunis melalui penyeludupan masuk dalam kepimpinan parti politik radikal Melayu. Kaedah penyebaran fahaman komunis secara langsung kepada orang Melayu tidak begitu berjaya. Hanya sebahagian kecil sahaja yang menyertai PKM. Kelompok Melayu yang menyertai Komunis ini membentuk satu rejimen yang dikenali sebagai rejimen Melayu ke-10. Komunis antara kepimpinan mereka iaitu Abdullah C.D, Rashid Maidin, dan Kamarulzaman Teh (Md. Hasri B Rajali, 2013).

Kaedah kedua melalui penyeludupan masuk dalam parti Radikal Melayu pula dilakukan oleh ejen komunis daripada orang Melayu sendiri iaitu Moktarruddin Lasso. Beliau merupakan salah seorang anggota PKI yang melarikan diri ke Tanah Melayu setelah gagal dalam pemberontakan Komunis Silungkang, Sumatera Barat 1927.² Moktarruddin Lasso juga merupakan salah seorang anggota *Malayan People's Anti-Japanese Army* (MPAJA) (Ahmad Adam, 2001). Langkah pertama, Moktarruddin Lasso berusaha mendekati orang Melayu melalui tawaran kewangan kepada nasionalisme Melayu yang bersifat radikal, iaitu Ahmad Boestamam bagi membiayai penerbitan akhbar *Suara Rakyat*. Setelah itu, mereka membincangkan penubuhan sebuah parti politik radikal Melayu yang bukan Komunis untuk dijadikan ejen penyebar fahaman Komunis iaitu PKMM.

1 Malayan People's Anti-Japanese Army (MPAJA) merupakan sebuah organisasi yang ditubuhkan semasa penjajahan Jepun, MPAJA ditubuhkan hasil kerjasama antara PKM dengan British untuk menentang Jepun. Anggota MPAJA yang terdiri daripada ahli PKM disediakan senjata, kewangan serta latihan oleh pihak British, mereka berjuang dalam hutan dalam bentuk gerila (Ho Hui Ling, t.t.; 2015).

2 Keterangan lanjut mengenai pemberontakan komunis di Jawa dan Sumatera barat sila rujuk Ruth. T. Mcvey. (1965).





3.0 Parti Kebangsaan Melayu Malaya (PKMM)

PKMM lahir hasil daripada satu pertemuan di antara Moktaruddin Lasso dengan pengikutnya dan Ahmad Boestaman serta pengikutnya yang bekerja dalam akhbar *Suara Rakyat* seramai 20 orang. Semuanya yang hadir dalam pertemuan tersebut berasal dari negeri Perak sahaja seperti diakui oleh Ahmad Boestaman dalam Memoir beliau (A. Samad Ismail, 2004). Pertemuan itu berlangsung dalam ruang pejabat pengarang dan pentadbiran *Suara Rakyat* di Ipoh, Perak pada 17 Oktober 1945. Moktarudin Lasso menjadi presiden pertama PKMM (Ahmad Adam, 2001). Kemudiannya kepimpinan tertinggi PKMM berubah semasa kongres kedua parti ini, setelah Moktaruddin Lasso menghilangkan diri selepas beberapa hari kongres pertama diadakan. Menurut sesetengah pengkaji mengatakan Moktaruddin Lasso menghilangkan diri ke Indonesia kerana menjadi buruan Penjajah British (Ramlah Adam, 2003). Secara tidak langsung, susunan kepimpinan baru ini telah mengeneipkan golongan komunis yang diterajui oleh Moktaruddin Lasso. Bermula dari kongres ini, tampok pemerintahan parti mula diambil alih oleh golongan agama dan golongan sekular. Burhanuddin al-Hilmy dari golongan agama telah dilantik sebagai presiden, Ishak Muhammad sebagai naib Presiden, dan Jawatan Setiausaha Agung diambil alih oleh Zukifli Auni dan kemudian Ahmad Boestaman (Mohamed Salleh Lamry, 2006).

Semasa Burhanuddin Al-Hilmy menjadi presiden, parti ini cuba dibawa dengan ideologi pembaharuan Islam dalam membentuk nasionalisme Melayu sama seperti tokoh nasionalisme Islam Indonesia iaitu Mas Mansur yang beraliran Kaum Muda (Tajdid) yang memperkenalkan satu pembaharuan dalam kebangkitan dan semangat nasionalisme dalam konteks Islam (H. Haikal, 1992). Kepimpinan PKMM kemudiannya berubah ke tangan golongan kebangsaan semasa kongres ketiga dan terakhir yang diadakan di Singapura pada Disember 1947. Rancangan mengambil alih kepimpinan dilakukan oleh golongan komunis diketuai oleh Abdullah C. D dan golongan kebangsaan yang dilakukan oleh Ahmad Boestaman (H. Haikal, 1992; Ramlah Adam, 2009). Akhirnya kepimpinan parti diambil alih oleh golongan kebangsaan dibawah pimpinan Ishak Muhammad. Penukaran kepimpinan ini disebabkan sikap Burhanuddin al-Hilmy yang suka bertolak ansur dan mudah mempercayai orang baru dikenalnya sehingga menyebabkan perancangan parti mudah diketahui dan dipatahkan oleh lawan (Ramlah Adam, 2003).

Perjuangan PKMM bermula dengan perjuangan menentang Malayan Union bersama dengan gabungan parti nasionalis Konservatif membentuk UMNO. Kemudian, PKMM berpisah dengan UMNO selepas Malayan Union digantikan dengan Perlembagaan Persekutuan Tanah Melayu 1946





pada Disember 1948. PKMM menolak Perlembagaan Persekutuan Tanah Melayu 1948, manakala UMNO pula menerima kerana tuntutan mereka sebelum ini dilaksanakan dalam perlembagaan baru itu. Penolakan PKMM pula disebabkan sistem ini sama dengan sistem penjajahan British sebelum ini yang hanya mengembalikan semula kuasa kepada golongan feudal dan sistem demokrasi tidak terlaksana seperti yang dituntutnya. Di samping itu, penggunaan Bahasa Melayu sebagai Bahasa Kebangsaan tidak dilaksanakan, malahan Singapura berada dalam keadaan terpisah dari Persekutuan Tanah Melayu (Mohamed Salleh Lamry, 2006).

Akhirnya PKMM telah bergabung dengan semua pertubuhan radikal Melayu seperti Angkatan Pemuda Insaf (API), Angkatan Wanita Sedar (AWAS) dan Hisbul Muslimin (HM) membentuk PUTERA. Pakatan ini dilahirkan untuk menguatkan gerakan radikal Melayu untuk bergabung dengan gerakan Radikal bukan Melayu yang menubuhkan *All-Malayan Council of Joint Action* (AMCJA). Gabungan itu dikenali sebagai PUTERA-AMCJA dan gabungan ini digunakan untuk menentang Perlembagaan Persekutuan dengan mencipta perlembagaannya sendiri dengan nama "*Perlembagaan Rakyat*" (Ishak Saat, 2010).

Perlembagaan Rakyat merupakan alternatif kepada Perlembagaan Persekutuan. Perlembagaan tersebut diserahkan kepada pihak British. Namun, perlembagaan ini ditolak. Sebagai tanda protes mereka melancarkan Hartal iaitu mogok yang melibatkan aktiviti ekonomi harian penduduk berhenti. Hartal dilaksanakan seluruh Tanah Melayu pada 20 Julai 1947 oleh golongan Radikal. Pada Jun 1948, gabungan itu berpecah setelah PKM melancarkan gerakan bersenjata (Mohamed Salleh Lamry, 2006). Tindakan pantas pihak British bagi mengelakkan tentangan terhadap pemerintah lebih besar berlaku, gerakan Radikal telah diharamkan bermula dengan API pada 30 Jun 1947 kemudian pada Julai 1948 Darurat diisytiharkan yang akhirnya semua gerakan radikal Melayu diharamkan termasuk PKMM (CO 537/2151; Ho Hui Ling, 2004).

Menurut Abdullah C. D, selepas darurat diisytiharkan beliau bersama Ahmad Boestamam dan Burhanuddin Al-Hilmi telah mengadakan perbincangan khas di Kuala Lumpur. Hasil daripada perbincangan tersebut, Abdullah C. D dengan Ahmad Boestamam mengambil langkah sebagai gerila di hutan, manakala Burhanuddin Al-Hilmi diarahkan bergerak melalui undang-undang. Ahmad Boestamam telah merancang untuk mendirikan pengkalan di Tanjung Malim dengan anak buahnya kiri-kira 60 orang, tetapi sebelum bertindak Ahmad Boestaman ditangkap dan dipenjarakan selama tujuh tahun (Islam Melayu Komunis, 2005). Pengisytiharan darurat ini telah memusnahkan pergerakan PKMM di seluruh Tanah Melayu kerana hampir kesemua kepimpinan PKMM seperti Ahmad Boestamam, Ishak Muhammad dan Abu Bakar Al-Bakir telah ditangkap oleh kerajaan British kecuali Burhanuddin Al-Hilmi (Ramlah Adam, 2004).





4.0 Usaha Komunis Menguasai Parti Kebangsaan Melayu Malaya (PKMM)

Percubaan komunis menyerap masuk dalam gerakan Radikal dilakukan melalui dasar Barisan Bersatu. Barisan bersatu merupakan teori politik komunis antarabangsa. Mereka akan menyelusur masuk dalam gerakan kebangsaan melalui dua cara. Pertama, dari atas ke bawah; dan kedua, dari bawah ke atas. Kaedah dari atas ke bawah bermaksud komunis memasuki sesebuah organisasi secara terbuka atau secara langsung pada peringkat kepimpinan dan mempengaruhi organisasi tersebut. Akhirnya, mereka akan mengambil alih organisasi tersebut. Kaedah menyelusuri dari bawah ke atas pula, mereka bergerak dan menjalankan dakwah komunis dengan cara perlahan-lahan kepada anggota bawahan organisasi sehinggalah semua ahli organisasi tersebut menyakini perjuangan komunis sahaja yang boleh membebaskan mereka dari penjajah. Pada masa inilah kepimpinan organisasi tersebut akan diambil alih oleh pemimpin komunis (Mohamed Salleh Lamry, 2009).

Kaedah dari atas ke bawah telah digunakan oleh Komunis untuk memasuki gerakan Radikal Melayu. Kaedah ini bertujuan menyerap masuk dalam gerakan Radikal Melayu bermula dengan jalinan perhubungan baik dengan tokoh Radikal Melayu iaitu Ahmad Boestamam melalui penerbitan akhbar *Suara Rakyat* dan *Voice of the People* (Cheah Boon Kheng, 2003). Perhubungan terjalin setelah Moktaruddin Lasso yang merupakan anggota PKM menyumbang modal dalam penerbitan akhbar tersebut tanpa syarat dan pada peringkat awal tiada sebarang idea komunis dianjurkan untuk dimasukkan dalam akhbar mereka. Seperti mana pengakuan Ahmad Boestamam dan Mohd Salleh Daud, bekas pengarang *Voice of the People* mereka (komunis) tidak mengganggu polisi jabatan pengarang dan cuba menyelit fahaman komunis dalam penulisan mereka (Ahmad Boestamam, 1972; Mohd Salleh Daud, 1998).

Setelah perhubungan mereka terjalin pihak komunis mulai menyerap aliran komunis dalam gerakan radikal Melayu melalui satu pertemuan di pejabat Suara Rakyat di Ipoh. Pertemuan tersebut melibatkan Moktaruddin Lasso dan beberapa ahli komunis Melayu lain bersama dengan gerakan Radikal Melayu yang disertai oleh Ahmad Boestamam dan rakan-rakan. Mereka telah bersetuju menubuhkan sebuah parti untuk memperjuangkan kemerdekaan Tanah Melayu (Mohamed Salleh Lamry, 2009). Hasil dari perbincangan tersebut lahirlah PKMM. Pembentukan PKMM adalah permulaan kemasukan aliran komunis dalam gerakan radikal Melayu. Pembentukan parti ini bersesuaian dengan dasar dari atas ke bawah komunis yang bermatlamatkan penyatuan bersama gerakan radikal Melayu berasaskan kepada cita-cita politik yang sama iaitu kemerdekaan Tanah Melayu, sikap anti penjajah British dan anti Feudal. Walau bagaimanapun, jika diteliti PKM cuba untuk menguasai PKMM.

Ramlah Adam (2009) ada menyatakan, PKM cuba menggunakan gerakan radikal Melayu sebagai sayap kepada PKM yang berperanan sebagai penyebar atau agen untuk menaikkan imej dan menyebarkan fahaman komunis dikalangan orang ramai. Kenyataan Ramlah Adam ini mempunyai persamaan dengan pengakuan sendiri oleh Abdullah C.D:





“...dalam menghadapi penjajah British, PKM tidak tampil kedepan tetapi memainkan peranan terpenting dibelakang barisan bersatu tersebut. Hal ini juga berlaku di Indonesia. Mereka telah membentuk front persatuan (barisan bersatu) di atas dasar NASAKOM, iaitu nasionalis, sosialis, agama dan komunis.”

(Islam Melayu Komunis, 2005).

PKM di Tanah Melayu pula menggunakan Parti-parti gerakan radikal Melayu sebagai ejen mereka untuk menyampaikan fahaman komunis dalam masyarakat Melayu bagi mencapai objektif mereka melalui cara barisan bersatu mereka. Kebiasaan pihak PKM menggunakan medan parti radikal Melayu sebagai perwakilan PKM selalu hadir dalam mana-mana kongres atau perjumpaan parti gerakan radikal Melayu. Kehadiran wakil komunis dalam perjumpaan parti gerakan radikal Melayu dapat dilihat dalam penglibatan Ismail Teken dalam ceramah politik yang dianjurkan oleh PKMM dan kehadiran Liew Yit Fan dalam majlis perasmian Angkatan Pemida Insaf (API) di Termerloh pada Mei 1946, malah diberi peluang memberi ucapan (Mohamed Salleh Lamry, 2006; Ibrahim Chik, 2004).

Tindakan-tindakan komunis menunjukkan mereka cuba meluaskan pengaruh mereka melalui perjuangan tanpa kekerasan bersenjata dan mengeratkan perhubungan antara kaum terutamanya kaum Melayu. Menurut Ramlah Adam (2009), mereka menggunakan gerakan radikal Melayu sebagai jalan untuk mewujudkan sokongan di kalangan orang Melayu bagi menubuhkan *Malayan Democratic United Front* iaitu:

1. Menubuhkan pemerintahan sendiri di Malaya.
2. Menubuhkan perhimpunan nasional Se-Malaya yang dipilih, hak untuk mengundi dan pengenalan perlembagaan bersifat demokrasi.
3. Mewujudkan kerajaan bersifat demokrasi dan jaminan bagi hak-hak sivil yang asas, seperti kebebasan bercakap.
4. Menyusun semula struktur ekonomi Negara. Pembaikan gaji dan upah, dan pengurangan pengangguran dan cukai yang terlalu tinggi (sistem ekonomi sosialis).
5. Penyusunan semula sistem pendidikan.
6. Menetapkan waktu kerja lapan jam sehari dan memperbaiki keadaan kerja pekerja dan petani.
7. Hak yang sama bagi wanita dalam politik dan masyarakat.
8. Perpaduan dengan rakyat tertindas dari Timur jauh.





Jika dianalisis penerimaan Aliran Komunis dalam Gerakan Radikal Melayu sebenarnya disebabkan dua kepentingan. Pertama, kepentingan kewangan. Mereka ingin menjadikan PKM sebagai sumber kewangan mereka. Kewangan PKM yang kukuh menyebabkan PKMM terpaksa bergantung kepada mereka. Penerimaan sumbangan kewangan daripada pihak PKM kepada gerakan Radikal terdapat dalam rekod pentadbiran pihak British (CO 537/4742/522243/4). Kedua, gerakan Radikal Melayu menggunakan kerjasama bagi memperolehi sokongan dari PKM yang telah mempunyai kekuatan politik untuk menentang penjajah dan Feudal Melayu bagi memperolehi kemerdekaan (Ramlah Adam, 2003). Selain daripada faktor ini terdapat beberapa faktor lain yang menyebabkan aliran komunis gagal menguasai PKMM.

5.0 Keberkesanan Fahaman Komunis Menguasai Parti Kebangsaan Melayu Malaya (PKMM)

Berdasarkan analisis yang dibuat, dasar atau teori barisan bersatu yang digunakan melalui komunis untuk menggunakan PKMM sebagai alat mereka menyebarkan fahaman komunis secara sembunyi tidak berjaya. Berdasarkan kepada penelitian dapat disimpulkan terdapat beberapa faktor yang menyebabkan fahaman komunis tidak berjaya menguasai atau mempergunakan PKMM sebagai agen mereka meyebar fahamannya.

5.1 Objektif utama kerjasama hanyalah menuntut kemerdekaan Tanah Melayu sahaja.

PKMM bukan berbentuk dogmatik, ideologi nasionalis mereka tidak terhad kepada satu sahaja. Ideologi mereka bercampur dengan nasionalis sosialis, nasionalis komunis, nasionalis Islam, Pan-Islam, demokrasi, konformis dan pelbagai daripada aliran kebangsaan, agama dan komunis. Perkara yang menjadi keutamaan mereka ialah kemerdekaan Tanah Melayu (Abu Talib Ahmad, t.t). Kesedaran untuk bebas dari penjajah asing adalah kunci utama kepada perjuangan orang Melayu yang menyertai PKMM. Bagi mereka penglibatan aliran komunis dalam PKMM hanyalah sebagai pembantu atau satu kerjasama untuk mencapai cita-cita yang sama iaitu kemerdekaan Tanah Melayu daripada penjajah. Semangat untuk merdeka dalam kalangan PKMM sudah wujud sejak awal tahun 1930-an lagi bermula dengan Kesatuan Melayu Muda (KMM) dan lebih bersemangat lagi selepas penjajahan Jepun yang bengis dan kejam.³

³ Terdapat tiga sebab semangat kemerdekaan dalam kalangan PKMM membara. Pertama, menerima pendidikan Jepun yang menerapkan semangat Nippon seperti Asahi dan Busyido, serta penyebaran akhbar tentang kehebatan Jepun dan pahlawan asia lain termasuk tokoh Melayu dalam akhbar dan majalah seperti Semangat Asia, Fajar Timur, dan sebagainya telah meningkatkan keyakinan untuk memerintah tanah air sendiri (Muhd Yusuf Ibrahim, t.t). Kedua, pentadbiran Jepun telah melantik beberapa orang Melayu yang kemudiannya menyertai PKMM sebagai pentadbir antaranya Burhanuddin Al-Hilmy sebagai Penasihat Adat Istiadat dan Kebudayaan Melayu sebagai persediaan kemerdekaan Tanah Melayu pada 21 April 2016 (Kamarudin Jaffar, t.t). Ketiga, orang Melayu diberi latihan ketenteraan dalam Giyu-Gun, Giyu-Tai, dan Hai-Ho. Antara orang Melayu Radikal yang menyertai latihan ketenteraan iaitu Ahmad Boestamam (M. A. Basri, t.t).





Kerjasama bagi menuntut kemerdekaan Tanah Melayu telah diakui sendiri oleh Abdullah C. D yang beraliran komunis dalam PKMM (beliau juga ahli PKM):

“...Dalam perjuangan besar untuk kemerdekaan tanah air, kaum komunis, nasionalis, dan agama telah bersatu melawan penjajah. Di Malaya PKM dan PKMM berkerjasama sangat rapat. Dalam PKMM, terdapat anggota daripada pelbagai aliran-nasionalis, agama, sosialis, komunis. Tapi kami tidak kira apa alirannya, kami dapat ketepikan perbezaan, dapat bersatu dan berkerjasama. Ini kerana kami adalah kaum patriot yang anti imperialis, anti kolonialis dan cintakan kemerdekaan, kebebasan...” (Islam Melayu Komunis, 2005).

Burhanuddin Al-Hilmy yang merupakan aliran Agama dalam PKMM turut mengakui kerjasama antara aliran adalah untuk memperolehi kemerdekaan sahaja:

“...Kita menentang penjajah tetapi tidak pula pro komunis. Kita mahu balik hak keadilan tanah air kita dan kebangsaan kita dan kebangsaan kita yang berdaulat, sebagaimana sebelum kita dipengaruhi dan dijajah dahulu...” (Burhanuddin Al-Hilmy, 1955).

Kerjasama ini jelas menunjukkan penyatuan mereka untuk mendapat kemerdekaan Tanah Melayu sebagai tujuan utama, walaupun terdapat cubaan fahaman komunis menguasai PKMM seperti yang dinyatakan oleh beberapa penulis sejarah politik. Namun, percubaan itu ternyata gagal berdasarkan kepada bukti yang jelas selepas PKMM diharamkan oleh penjajah British pada tahun 1948. Hanya sebahagian kecil pemimpin dan ahli PKMM menyertai PKM. Mereka yang menyertai PKM itu sememangnya merupakan ahli PKM yang menyertai PKMM antaranya Abdullah C.D dan Rasid Maiden. Aliran kebangsaan pula telah menyertai UMNO dan aliran Agama menyertai PAS. Abu Talib Ahmad (t.t) menggelarkan kumpulan ini sebagai Kiri Fana (*transient left*). Bukti ini jelas menggambarkan tujuan komunis menguasai PKMM gagal, tetapi mereka hanya diterima berkerjasama atas objektif yang sama iaitu menuntut kemerdekaan Tanah Melayu. Jika dikatakan aliran komunis berjaya mempengaruhi atau menguasai PKMM, sudah tentu selepas darurat diistiharkan semua ahli dan pemimpin PKMM akan menyertai aliran komunis dalam PKM. Tetapi, yang berlaku adalah sebaliknya.





5.2 Keperluan Kewangan

PKMM merupakan gerakan daripada rakyat bawahan yang tidak mempunyai sumber kewangan yang kukuh. Sejarah penubuhan parti mereka telah menunjukkan bermula daripada bantuan kewangan pihak PKM. Faktor kewangan adalah salah satu sebab kerjasama orang Melayu berhaluan kiri menerima aliran komunis membentuk PKMM. Walaupun tujuan komunis menyertai PKMM hanyalah untuk mempengaruhi orang Melayu didalamnya, tetapi mereka tidak berjaya mempengaruhi ahli PKMM. Kebanyakan ahli PKMM tidak menerima ideologi komunis disebabkan dendam orang Melayu semasa empat belas hari kekalahan tentera Jepun. Mereka hanya berkerjasama untuk mendapat bantuan kewangan bagi menuntut kemerdekaan sahaja.

Dendam orang Melayu terhadap komunis sangat menebal semenjak peristiwa penguasaan komunis melalui Bintang Tiga atau Malayan *People's Anti-Japanes Army* (MPAJA) yang mengisytiharkan mereka akan berkuasa di Tanah Melayu pada 15 ogos 1945 (Chean Boon Kheng, 1983). Mereka telah menghukum orang yang disyaki sebagai tali barut Jepun dan kebanyakan mangsa mereka adalah orang Melayu. Mereka dibunuh dengan kejam sehinggakan ada yang di ikat kaki dan tangan, kemudian di masuk dalam guni dan dicampak ke laut hidup-hidup (Ibrahim Mahmood, 1981). Tentera Bintang Tiga juga mempersendakan agama Islam. Beberapa buah masjid di kampung dijadikan bilik gerakan dan dewan drama oleh Bintang Tiga (Ghazali Basri, 1975). Di Batu Pahat, mereka telah melarang orang Islam berkumpul dan beribadat di masjid (Hairi Abdullah, 1973), manakala di Perak dan Batu Pahat, Gerila Komunis telah menembak orang Melayu ketika mengerjakan solat Jumaat. Di Muar pula berlakunya penyembelihan babi di Masjid Air Ilizam. Selain daripada menghina agama Islam, mereka juga memaksa orang Melayu menyertai gerila Bintang Tiga (Kenelm O.L Burridge, 1951).

Peristiwa-peristiwa kekejaman komunis ini memberi kesan besar kepada orang Melayu dalam PKMM untuk menerima fahaman komunis. Sumber kewangan adalah salah satu kepentingan ahli dan kepimpinan PKMM berkerjasama dengan aliran komunis. Melalui kerjasama ini memperlihatkan PKMM mempunyai kepentingan kewangan sahaja dan tidak menerima fahaman komunis.





5.3 Kepimpinan tertinggi dikuasai oleh aliran Kebangsaan dan Agama

Pada awalnya, PKMM ditubuhkan bertujuan membentuk satu unit baru komunis untuk mempengaruhi orang Melayu dengan pemikiran politik komunis melalui wakilnya Moktaruddin Lasso sebagai orang tengah untuk menyusun atau mewujudkan satu unit baru komunis untuk mempengaruhi orang Melayu. Namun, akhirnya parti ini dikuasai oleh golongan Melayu yang berfikir politik nasionalis agama dan nasionalis kebangsaan. Usaha pihak komunis untuk menguasai gerakan politik radikal Melayu melalui penyeludupan masuk dalam PKMM gagal disebabkan terdapat tiga aliran pemikiran politik dalam PKMM iaitu aliran agama, komunis dan kebangsaan. Aliran komunis terhalang oleh dua kumpulan pemikiran politik lain iaitu aliran agama dan kebangsaan yang kuat berbanding dengan pemikiran politik komunis yang sedikit pengaruhnya.

Penguasaan parti komunis hanyalah untuk beberapa bulan sahaja iaitu pada peringkat awal penubuhan PKMM melalui kepimpinan utama mereka iaitu Moktarudin Lasso yang menjadi presiden parti. Moktaruddin Lasso merupakan aliran komunis yang berpengaruh dan salah seorang yang menubuhkan PKMM. Walau bagaimanapun, setelah kemasukan tokoh aliran lain secara kemasukan dalam PKMM yang sangat berpengaruh dalam kalangan gerakan radikal Melayu daripada aliran agama dan kebangsaan iaitu Burhanuddin al-Hilmy dan Ishak Muhammad, kepimpinan mulai dikuasai sepenuhnya oleh golongan ini.

Penguasaan pemimpin aliran agama dan kebangsaan ini telah menolak aliran komunis kerana aliran ini jelas menolak fahaman komunis. Percubaan pihak komunis memasuki dan menguasai gerakan radikal Melayu berdasarkan kepada teori Barisan Bersatu dengan kaedah dari atas ke bawah akhirnya tidak berjaya. Penguasaan sebenar PKMM berada dalam pengaruh penuh aliran agama yang diketuai oleh Burhanuddin Al-Hilmy. Sementara itu, aliran kebangsaan Melayu dipimpin oleh Ahmad Boestamam dan Ishak Muhammad. Jika diteliti, aliran Komunis hanya berjaya menguasai PKMM pada peringkat awal sahaja iaitu meletakkan Moktaruddin Lasso (ahli Parti Komunis Indonesia) sebagai presiden PKMM sahaja (Ramlah Adam, 2009).





6.0 Kesimpulan

Penubuhan PKMM merupakan hasil daripada tajwaan Moktaruddin Lasso yang beraliran komunis tidak dapat disangkal lagi. Sememangnya penubuhan PKMM melibatkan peranan besar aliran komunis yang cuba untuk menguasai atau mempengaruhi orang Melayu melalui parti ini. Walau bagaimanapun, setelah tokoh aliran agama iaitu Dr Burhanuddin Al-Hilmiy serta tokoh aliran Kebangsaan iaitu Ishak Muhammad menyertai PKMM, dan Moktaruddin Lasso lari daripada Tanah Melayu. PKMM mula dikuasai oleh aliran agama dan kebangsaan. Jika diteliti, Aliran Komunis hanya berjaya menguasai PKMM dalam kepimpinan pada peringkat awal sahaja dengan kejayaan meletakkan Moktaruddin Lasso (ahli Parti Komunis Indonesia) sebagai presiden PKMM.

Kegagalan aliran komunis menguasai PKMM juga disebabkan oleh objektif perjuangan yang sama iaitu menuntut kemerdekaan Tanah Melayu. Penerimaan ahli PKMM kepada aliran komunis hanyalah sebagai bantuan atau kerjasama untuk memerdekakan Tanah Melayu sahaja, mereka bukan menerima aliran komunis sebagai ideologi mereka. Faktor kewangan juga menjadi sebab kegagalan aliran komunis menguasai PKMM kerana gerakan radikal Melayu berkerjasama dengan mereka adalah atas faktor kewangan. Kewangan merupakan salah satu sebab penerimaan gerakan Radikal Melayu kepada aliran komunis kerana mereka tidak mempunyai sumber kewangan yang kukuh.

Secara keseluruhan dapat dinyatakan usaha aliran komunis menguasai PKMM gagal disebabkan kerjasama antara mereka hanyalah atas dasar kepentingan aliran masing-masing. Aliran komunis berkerjasama atas kepentingan mereka untuk menguasai PKMM sebagai alat propaganda mereka. Gerakan Radikal Melayu (aliran agama dan kebangsaan) pula berkerjasama atas kepentingan kewangan dan kekuatan PKM melalui penyertaan aliran komunis dalam PKMM menuntut kemerdekaan Tanah Melayu.

Rujukan

A. Samad Ismail (pnys). (2004). *Memoir Ahmad Boestaman: Merdeka dengan Darah dan Api*. Bangi: Penerbit Universiti Kebangsaan Malaysia.

Abu Talib Ahmad. (t.t). *Aliran Kiri dalam Nasionalisme Melayu, 1945-57: Satu Pemerhatian*. Diakses daripada http://www.myjurnal.my/filebank/published_article/22910/024_051.PDF. Pada 21 April 2016.

Ahmad Boestamam. (1972). *Merintis Jalan Ke Puncak*. Kuala Lumpur: Penerbit Kejora. Hlm 11. Lihat juga. Mohd Salleh Daud. 1998. *Memoir bukan Seorang Konformis*. Kuala Lumpur: Dewan Bahasa dan Pustaka.





Ahmat Adam. (2001). Parti Kebangsaan Melayu Malaya: Sebuah mimpi Nusantara. *Journal of History, politics & Strategic Studies*. Vol. 28.

Burhanuddin Al-Hilmy. (1955). *Pidato di Kongres Parti Rakyat*. Dlm. Kamaruddin Jaffar (pnyt). 2000. Dr. Burhanuddin Al-Hilmy: Pemikiran dan Perjuangan. Kuala Lumpur. IKDAS Sdh. Bhd.

Cheah Boon Kheng. (2003). *The Masked Comrades: A Study of the Communist Front 1945-48*. Singapore: Time Book International.

Cheah Boon Kheng. (2003). *The Masked Comrades: A Study of the Communist Front 1945-48*. Singapore: Time Book International.

Chean Boon Kheng. (1983). *Red Star Over Malaya: Resistance and Social Conflict During and After Japanese occupation of Malaya 1941-1946*. Singapore: Singapore University Press.

CO 537/2151, *Surat Edward Gent kepada SS/CO*, 1 Julai 1947.

CO 537/4742/522243/4, Political Report No.3. For January 1949. Malaya Nasionalis Parti.

Ghazali Basri. (1975). *Hilir Perak: Sejarah Hubungan Ras Zaman pemerintahan Jepun sehingga Pemerintahan Tentera*. Latihan Ilmiah. B.A. Jabatan Sejarah Universiti Malaya.

H. Haikal. (1992). Meninti Jejantas Nasionalis-Islam dan Nasionalis-Sekular (Sekilas Biografi Mas Mansur 1896-1946), *JEBAT*. Bil. 20.

Hairi Abdullah. 1973/4, 1974/5. Kebangkitan dan Gerakan Selendang Merah dalam Sejarah Muar dan Batu Pahat. *JEBAT*. Bil.3, no. 4.

Ho Hui Ling. (2004). *Darurat 1948-1960: Keadaan Sosial di Tanah Melayu*. Kuala Lumpur Universiti Malaya.

Ho Hui Ling. (2015). Gerakan Komunis dan PKM: Penelitian terhadap usaha Komunis terhadap usaha Komunis mempengaruhi orang Melayu 1920-1989. *Melayu, Journal Antarabangsa Dunia Melayu*. 8(1) 63-92.

Ho Hui Ling. (t.t). Suasana di Tanah Melayu pada zaman darurat 1948-1960: satu tinjauan. Diakses daripada <http://portalfsss.um.edu.my/portal/uploadFolderpada> 2 Februari 2016.

Ibrahim Chik. (2004). *Memoir Ibrahim Chik: Dari API ke Rejimen Ke-10*. Bangi: Penerbit Universiti Kebangsaan Malaysia.

Ibrahim Mahmood. (1981). *Sejarah Perjuangan Bangsa Melayu*. Kuala Lumpur: Pustaka Antara.





Ishak Saat. (2010). Caturan Politik Pelbagai Kaum di Tanah Melayu 1946-1957. *JEBAT*. vol 39.

Islam Melayu Komunis: Wawancara dengan Abdullah C.D, Rashid Maidin, Abu Samah. (2005). Petaling Jaya: SIRD.

Kamarudin Jaffar. (t.t). Perjuangandan Pemikiran Politik Dr. Burhanuddin Al-Hilmy. Diakses daripada <http://ejournal.ukm.my/akademika/article/viewFile/662/2221>. Pada 21 April 2016.

Kenelm O.L Burridge. (1951). Racial Relitions in Johore. *Australian Journal of Politics and History*. Vol. II, No. 2. May.

Ruth. T. Mcvey. (1965). *The rise of Indonesia Comunism*, Ithac Cornell: University Press.

M. A. Basri. (t.t). Perak Sebelum dan Selepas Perang Dunia Kedua: Satu Analisis tentang Nasionalisme orang Melayu. *ANALISIS*. Jil. 1: 121-150.

Mahmud Embong. (1989). *"Perkembangan Rejimen Ke-10 Melayu, Parti Komunis Malaya dari 1949 Hingga 1989"*. Tesis Ph.D. Jabatan Sejarah, Fakulti Sastera dan Sains Sosial, Universiti Malaya, Kuala Lumpur.

Mahmud Embong. (1992). "Penglibatan Orang Melayu dalam Pergerakan Komunis Peringkat Awal di Tanah Melayu, 1924-1938" . *PURBA*, Bil. 11, hlm. 81-92.

Mahmud Embong. (1992). "Komunisme dan Orang Melayu, 1924-1949" dlm. Kobkua Suwannathat-Pian, Rohany Nasir, Mohammad Agus Yusoff (ed.), Dua Dekad Penyelidikan: Sejarah-Bahasa dan Kebudayaan. Bangi: Penerbit Universiti Kebangsaan Malaysia.

Md. Hasri B Rajali. (2013). Perkembangan politik kiri dari 1948-1960 dan perjuangan gerakan ini dalam penulisan Abdullah C.D. Diakses daripada www.academia.edu/7918864/ pada 4 Februari 2016.

Mohamed Salleh Lamry. (2006). *Gerakan Kiri Melayu dalam Perjuangan Kemerdekaan*. Bangi Penerbit Universiti Kebangsaan Malaysia.

Mohamed Salleh Lamry. (2006). *Gerakan dan Tokoh Kiri: Kamarulzaman Teh dalam Kancah Perjuangan Kemerdekaan*. Petaling Jaya: SIRD.

Mohd Salleh Daud. (1998). *Memoir bukan Seorang Konformis*. Kuala Lumpur: Dewan Bahasa dan Pustaka.

Muhd Yusuf Ibrahim. (T.t) Pensejarahan Melayu dalam Zaman Pendudukan Jepun 1942-1945. *JEBAT*. Bil. 24: 109-118.





Ramlah Adam. (2009). *Gerakan Radikalisme di Malaysia (1938-1965)*. Kuala Lumpur: Dewan Bahasa dan Pustaka.

Ramlah Adam. (2003). *Burhanuddin Al-Helmy: Suatu Kemelut Politik*. Cetakan ke-3. Kuala Lumpur: Dewan Bahasa dan Pustaka.

Ramlah Adam. (2004). *Kemelut Politik Semenanjung*. Kuala Lumpur: Universiti Malaya.

Ramlah Adam. (2009). *Ahmad Boestaman: Satu Biografi Politik*. Kuala Lumpur: Dewan Bahasa dan Pustaka.

Ahmad Boestaman. (1972). *Dr. Burhanuddin Putera Setia Melayu Raya*, Kuala Lumpur: Pustaka Kejora.

T. Mcvey. (1965). *The Rise of Indonesia Communism*, Ithac Cornell: University Press.

